

Wat glo ons (Collage) oor Kerk vanuit ons verstaan van die Nuwe Testament?

Baie mense dink die kerk is 'n gebou wat natuurlik foutief is. Dit is interessant dat wanneer jy mense vra aan watter kerk hulle behoort dan verwys hulle na 'n spesifieke gebou in die omgewing en is dit natuurlik nie Bybels nie. Die woord "kerk" kom van die Griekse woord "ekklesia" wat gedefinieer word as "bymekaar kom" of "die wat geroep is". Die basiese betekenis van "kerk" is dus nie 'n gebou nie, maar mense. Dink aan Paulus se brief Romeine 16:5: "Groet ook die gemeente by hulle aan huis". Dit is duidelik nie 'n gebou nie maar mense wat bymekaar gekom het in die Naam van die Here.

Die woord kom 80 keer in die Nuwe Testament voor as Kerk en 36 keer as Kerke. "Kerk" verwys natuurlik soos vroeër gesê na 'n plaaslike geloofsgemeenskap of gemeente. Daarom is die voorkeurwoord wat meestal in die Afrikaanse vertalings soos die 53 vertaling wat vir Kerk gebruik word "Gemeente" of "Gemeentes". Christene het na die uitstorting van die Heilige Gees eers in die tempel bly aanbid (Hand.3 :1), maar van vroeg af spontaan as 'n gemeenskap van gelowiges bymekaar gekom (Hand.2:42; 20:7). Baie vinnig het gemeentes ontstaan waar gelowiges gereeld bymekaar gekom en aanbid het soos wat dit duidelik word in Handelinge (9:31; 15:41; 16:4). Paulus skryf ook in die algemeen vanuit die konteks van gemeentes vir gelowiges wat deel plaaslike geloofsgemeenskappe vorm (Rom.16:4 ; Rom.16:16; 1Kor.7:17 ; 1Kor.11:16 ; 1Kor.14:33 ; 1Kor.14:34; 1Kor.16:1,19; 1Kor.16:19 ens.). Die meeste sendbriewe is aan spesifieke Christelike gemeentes geskryf in gemeenskappe in daardie stede of streke (Korintiërs, Romeine, Efesiërs, Filippense, Galasiërs, Tessalonisense, Filemon, en so aan). Die meeste van die sendbriewe in die Nuwe Testament is gerig aan van gelowiges. Selfs die briewe wat hy geskrywe het aan persone soos Titus en Timotheüs was aan individue wat in die konteks van 'n gemeente gewerk het (2 Kor.8:23, Tit.1:5; 1Tim.1:3). Wanneer Jesus aan Johannes op Patmos opdrag gee om briewe te skryf is dit gerig aan 7 gemeentes. Reg deur die Nuwe Testament is al die gelowiges deel van 'n geloofsgemeenkap van onderlinge byeenkomste waarin Nagmaal gevier word, die Woord verkondig word en God aanbid word. Paulus gaan sover om self te verklaar dat die verhouding tussen Jesus en Sy gemeente 'n voorbeeld word van hoe 'n man en sy vrou se verhouding georden behoort te word en maak die groot stelling: "Manne, julle moet jul eie vrou liefhê, soos Christus ook die gemeente liefgehad en Homself daarvoor oorgegee het" (Ef.5:25). Jesus se verklaring van oorwinning is deur die gemeente wat op die rots gebou word (Mat.16:18). Die kerk is uiteindelik ook die liggaam van Christus en Hy is die hoof. Efesiërs 1:22-23 sê, "God het alle dinge onder Sy beheer gestel en Hom ook as Hoof van alles aan die kerk gegee. Die kerk is Sy liggaam, die volheid van Hom wat alles in elke oopsig met sy teenwoordigheid vul". Die liggaam van Christus is al die gelowiges in Jesus Christus vanaf die Pinksterdag (Handelinge 2) totdat Jesus terugkeer. Die liggaam van Christus bestaan uit twee aspekte: -

1) Die universele kerk bestaan uit almal wat in 'n persoonlike verhouding met Jesus Christus gekom het: "Want ons is almal ook deur een Gees gedoop tot een liggaam, of ons Jode of Grieke is, slawe of vrymanne; en ons is almal van een Gees deurdronge" (1 Kor.12:13). Die vers vertelwys vir ons dat enigiemand wat glo is deel van die liggaam van Christus en het die Heilige Gees as getuie. Die universele kerk van God is almal wat alreeds gered is deur geloof in Jesus Christus.

2) Die lokale of plaaslike kerk word in Galasiërs 1:1-2 as volg beskryf, "Paulus, 'n apostel nie vanweë mense of deur 'n mens nie, maar deur Jesus Christus en God die Vader wat Hom uit die dode opgewek het, en al die broeders wat by my is—aan die gemeentes van Galásië". Galasië was 'n provinsie van destydse Klein-Asië (hedendaagse Turkye) waar Paulus op sy eerste Sending reis verskeie Kerke geplant het en nou sy brief rig. Die universele kerk bestaan uit die wat aan Christus behoort en wat op Hom vertrou het vir hul redding. Die lidmate van die universele kerk moet gemeenskap en stigting of opbouing soek in die lokale of plaaslike kerk.

Opsommenderwys kom die begrip "Kerk" 116 keer in die Nuwe Testament voor wat die belangrikheid daarvan in God se raadsplan onderstreep. Die kerk is nie 'n gebou of 'n denominasie nie. Volgens die Bybel is die kerk die liggaam van Christus – almal wat hul geloof op Jesus Christus geplaas het vir hul redding en saligmaking. (Joh.3:16; 1 Kor.12:13). Die plaaslike kerk is waar lidmate van die universele kerk ten volle die "liggaam" beginsels soos in 1 Korintiërs 12 kan uitlewe naamlik gemeenskap, aanmoediging, onderrig, dienswerk en opbouing van mekaar deur die kennis en genade van Jesus Christus. Natuurlik is dit die "Kerk" wat die Bruid van Christus (Open.21:9;17) sal wees in die Bruilof van die Lam (Open.19:7).

Reg deur die Nuwe Testament word die voorkoms en funksie van die Kerk baie sterk beklemtoon. Die skrywer van die Hebreër brief stel dit baie sterk dat gelowiges nie die onderlinge byeenkoms van die geloofsgemeenskap moet verwaarloos nie (Heb.10:25). Dit is baie duidelik in die Nuwe Testament dat dit Jesus se wil is dat 'n gelowige deel moet vorm van 'n geloofsgemeenskap want dit is Christus se liggaam!